



An Bhruiséal, 16 Bealtaine 2024
(OR. en)

9700/24

**Comhad Idirinstitiúideach:
2024/0016(NLE)**

**RECH 219
COMPET 529
IND 251
TELECOM 173**

NÓTA

ó:	Coiste na mBuanionadaithe (Cuid 1)
chuig:	An Chomhairle
Uimh. an doic. roimhe seo:	9331/24
Uimh. an doic. ón gCoim.:	5836/1/24 REV 1
Ábhar:	Rialachán ón gComhairle lena leasaítear Rialachán (AE) 2021/1173 a mhéid a bhaineann le tionscnamh EuroHPC le haghaidh gnólachtaí nuathionscanta chun borradh a chur faoi cheannaireacht na hEorpa san Intleacht Shaorga iontaofa - <i>Comhaontú polaitiúil</i>

I. RÉAMHRÁ

- Ar an 25 Eanáir 2024, chuir an Coimisiún an togra¹ le haghaidh Rialacháin thuasluaite ar
aghaidh chuig Parlaimint na hEorpa agus chuig an gComhairle.
- Is é is cuspóir don Rialachán seo leasú a dhéanamh ar Rialachán (AE) 2021/1173 maidir leis
an gComhghnóthas Ríomhaireachta Ardfheidhmíochta Eorpach (EuroHPC) a bhunú, chun
sprioc bhreise a chur ar an gComhghnóthas tacú le héiceachóras Intleachta Saorga (IS) thar a
bheith iomaíoch agus nuálach a fhorbairt san Aontas trí Mhonarchana Intleachta Saorga a
fhorbairt agus a oibriú.

¹ 5836/1/24 REV 1.

3. Is cuid de thionscnamh nua an Aontais é an leasú atá beartaithe, tionscnamh maidir leis an intleacht shaorga a d'fhógair Ursula von der Leyen, Uachtarán an Choimisiúin Eorpaigh, ina haitheasc ar Staid an Aontais 2023, tionscnamh arb é is aidhm dó acmhainneacht sár-riomhaireachta an Aontais a chur ar fáil níos forleithne fós do ghnólachtaí nuathionscanta nuálacha Eorpacha i réimse na hintleachta saorga le go bhféadfadh siad a gcuid samhlacha a oiliúint.
4. Is ag leanúint de ghníomhaíochtaí an Chomhghnóthais EuroHPC reatha atáthar leis an leasú atá beartaithe. Leathnaíonn sé raon feidhme an Rialacháin reatha mar go ndéantar Monarchana IS a chur san áireamh, arna sainiú mar eintitis a sholáthraíonn bonneagar seirbhísí sár-riomhaireachta IS atá comhdhéanta, i measc nithe eile, de shár-riomhaire IS, ionad sonraí gaolmhar, agus seirbhísí sár-riomhaireachta atá dírithe ar IS.

II. AN OBAIR SNA hINSTITIÚIDÍ EILE

5. An 14 Feabhra 2024, chuaigh an Chomhairle i gcomhairle le Parlaimint na hEorpa agus le Coiste Eacnamaíoch agus Sóisialta na hEorpa. Ghlac Coiste Eacnamaíoch agus Sóisialta na hEorpa a thuairim an 20 Márta 2024².

Cuireadh an togra faoi bhráid an Choiste um Thionsclaíocht, um Thaighde agus um Fhuinneamh (ITRE) agus cheap an coiste sin Maria da Graça CARVALHO (EPP, PT) mar Rapóirtéir. Vótáil Parlaimint na hEorpa ar a tuarascáil ag an seisiún iomlánach a bhí aici an 22 go dtí an 25 Aibreán 2024.

III. CONCLÚID

6. Is pacáiste foriomlán cothrom é an togra comhréitigh arna sholáthar ag an Uachtaránacht, a d'fhéadfadh cur ar chumas na Comhairle teacht ar chomhaontú polaitiúil. Thacaigh na toscaireachtaí uile leis an téacs ón Uachtaránacht, ar an leibhéal teicniúil.
7. D'fhormhuinigh Coiste na mBuanionadaithe an téacs comhréitigh ón Uachtaránacht an 8 Bealtaine 2024 agus tá sé curtha faoi bhráid na Comhairle aige le haghaidh comhaontú polaitiúil ag an gcruinniú a bheidh ag an gComhairle Iomaíochais an 23 Bealtaine 2024.

² 8361/24.

Togra le haghaidh

RIALACHÁN ÓN gCOMHAIRLE

**lena leasaítear Rialachán (AE) 2021/1173 a mhéid a bhaineann le tionscnamh EuroHPC
le haghaidh gnólachtaí nuathionscanta chun borradh a chur faoi cheannaireacht na hEorpa
san Intleacht Shaorga iontaofa**

TÁ COMHAIRLE AN AONTAIS EORPAIGH,

Ag féachaint don Chonradh ar Fheidhmiú an Aontais Eorpaigh, agus go háirithe Airteagal 187 agus
Airteagal 188, an chéad mhír de,

Ag féachaint don togra ón gCoimisiún Eorpach,

Ag féachaint don tuairim ó Pharlaimint na hEorpa³,

Ag féachaint don tuairim ó Choiste Eacnamaíoch agus Sóisialta na hEorpa⁴,

Ag gníomhú di i gcomhréir le nós imeachta reachtach speisialta,

³ IO C , , lch. .

⁴ Tuairim an., IO C, lch.

De bharr an mhéid seo a leanas:

- (1) Is é is aidhm do Rialachán (AE) 2024/... ó Pharlaimint na hEorpa agus ón gComhairle⁵ lena leagtar síos rialacha comhchuibhithe maidir leis an intleacht shaorga (an ‘Gníomh um an Intleacht Shaorga’) feabhas a chur ar fheidhmiú an mhargaidh inmheánaigh trí chreat dlíthiúil aonfhoirmeach a leagan síos go háirithe maidir le forbairt, margú agus úsáid na hintleachta saorga i gcomhréir le luachanna an Aontais.
- (2) Ó bhí 2021 ann, nuair a glacadh Rialachán (AE) 2021/1173⁶ ón gComhairle, tá dul chun cinn teicniúil ollmhór déanta i réimse na hintleachta saorga (IS) agus tá sé ina réimse an-straitéiseach agus iomaíoch ar fud an domhain. Tá an tAontas ar thús cadhnaíochta sna hiarrachtaí chun tacú le taighde agus nuálaíocht fhreagrach in IS iontaofa eiticíúil agus, san am céanna, rianta cosanta a leagan síos agus rialachas éifeachtach a fhorbairt.
- (3) An 13 Meán Fómhair 2023, mar chuid de chur chuige cuimsitheach chun tacú le taighde agus nuálaíocht fhreagrach in IS, d’fhógair an Coimisiún tionscnamh straitéiseach nua chun acmhainneacht ríomhaireachta ardfheidhmíochta an Aontais a chur ar fáil do ghnólachtaí nuathionscanta Eorpacha nuálacha in IS iontaofa chun a samhlacha a oiliúint. Comhlánaíonn sé sin obair maidir le rianta cosanta le haghaidh IS trí Rialachán (AE) 2024/..., lena mbunaítear struchtúir rialachais, agus lena dtacaítear leis an nuálaíocht tríd an bPlean Comhordaithe um an Intleacht Shaorga.
- (4) Ós rud é go bhfuil an acmhainneacht sár-ríomhaireachta den chéad scoth is cumhachtaí ag an Aontas le fáil i saoráidí an Chomhghnóthais Ríomhaireachta Ardfheidhmíochta Eorpaigh (EuroHPC) (an ‘Comhghnóthas’), is iad na saoráidí sin ba cheart a chur ar fáil chun tionscnamh an Aontais a fhíorú. Dá réir sin, is gá cuspóir breise a thabhairt isteach leis na sé chuspóir de chuid an Chomhghnóthais atá ann cheana, cuspóir lena gcumhdófaí an rannchuidiú arna dhéanamh ag sár-ríomhairí le tionscnamh IS nua an Aontais.

⁵ Rialachán (AE) 2024/... ó Pharlaimint na hEorpa agus ón gComhairle lena leagtar síos rialacha comhchuibhithe maidir leis an intleacht shaorga (an Gníomh um an Intleacht Shaorga) agus lena leasaítear gníomhartha áirithe reachtacha de chuid an Aontais (IO L ...).

⁶ Rialachán (AE) 2021/1173 ón gComhairle an 13 Iúil 2021 maidir leis an gComhghnóthas Ríomhaireachta Ardfheidhmíochta Eorpach a bhunú agus lena n-aisghairtear Rialachán (AE) 2018/1488 (IO L 256, 19.7.2021, lch. 3, ELI: <http://data.europa.eu/eli/reg/2021/1173/oj>).

- (5) Leis an gcuspóir nua, bheadh an Comhghnóthas in ann gníomhaíochtaí a dhéanamh sna réimsí a bhaineann le sár-ríomhairí arna n-optamú le IS nó codanna de shár-ríomhairí a fháil agus a oibriú chun meaisínfhoghlaím agus oiliúint ar shamhlacha ilchuspóireacha IS a chumasú. Ba cheart cead a bheith ag an gComhghnóthas modh rochtana nua ar a acmhainní ríomhaireachta a chruthú d'éiceachóras na ngnólachtaí nuathionscanta i réimse IS agus d'éiceachóras an taighde agus na nuálaíochta agus feidhmeanna tiomnaithe IS a fhorbairt a bheidh optamaithe chun rith ar a shár-ríomhairí. Ba cheart cead a bheith ag an gComhghnóthas freisin eintitis óstacha EuroHPC atá ann cheana a cheapadh mar Mhonarchana Intleachta Saorga más féidir leis an eintiteas óstach a léiriú go bhfuil a dhóthain acmhainní ríomhaireachta ag a shár-ríomhaire chun oiliúint a chur ar shamhlacha mórsála ilchuspóireacha intleachta saorga agus ar fheidhmchláir intleachta saorga atá ag teacht chun cinn, agus ar choinníoll go bhfuil an raon iomlán gníomhaíochtaí breise is gá á chur chun feidhme ag an eintiteas óstach chun éiceachóras na hintleachta saorga a fhorbairt agus chun tacú leis an éiceachóras sin. Chuirfeadh na hathruithe sin ar chumas an Chomhghnóthais cumhacht agus seirbhísí ríomhaireachta saincheaptha a thairiscint chun oiliúint agus forbairt agus glacadh IS ar mhórsála a chothú san Aontas, rud nach bhfuil indéanta faoin Rialachán atá i bhfeidhm faoi láthair. Idirghníomhóidh Monarchana IS le chéile, le tionscnaimh intleachta saorga ábhartha de chuid an Aontais agus, i gcás inarb infheidhme, féadfaidh Monarchana IS idirghníomhú le héiceachórais náisiúnta ábhartha IS agus le tionscnaimh náisiúnta intleachta saorga.
- (6) Chun dáta chur i bhfeidhm an Rialacháin seo a ailíniú le dáta chur i bhfeidhm fhorálacha Rialachán (AE) 2024/... [an Gníomh um an Intleacht Shaorga] ó Pharlaimint na hEorpa agus ón gComhairle lena leagtar síos rialacha comhchuibhithe maidir leis an intleacht shaorga, ba cheart feidhm a bheith aige gan moill mhíchuí.
- (7) Dá bhrí sin, ba cheart Rialachán (AE) 2021/1173 a leasú dá réir,

TAR ÉIS AN RIALACHÁN SEO A GHLACADH:

Airteagal 1

Leasaítear Rialachán (AE) 2021/1173 mar a leanas:

(1) leasaítear Airteagal 2 mar a leanas:

(a) cuirtear pointí (3 a) agus (3b) seo a leanas isteach:

‘(3a) ciallaíonn ‘sár-ríomhaire arna optamú leis an intleacht shaorga’ sár-ríomhaire a dheartar go príomha chun oiliúint a chur ar shamhlacha mórsála ilchuspóireacha intleachta saorga agus ar fheidhmchláir intleachta saorga atá ag teacht chun cinn;

(3b) ciallaíonn ‘Monarcha Intleachta Saorga’ eintiteas láraithe nó dáilte a sholáthraíonn bonneagar seirbhísí sár-ríomhaireachta intleachta saorga atá comhdhéanta de shár-ríomhaire arna optamú leis an intleacht shaorga nó cuid de shár-ríomhaire, lárionad gaolmhar sonraí, rochtain thiomnaithe agus seirbhísí sár-ríomhaire atá dírithe ar an intleacht shaorga agus tallann a mhealladh agus a chomhthiomsú chun na hinniúlachtaí is gá a sholáthar chun na sár-ríomhairí le haghaidh na hintleachta saorga a úsáid;’;

(b) cuirtear an méid seo a leanas in ionad phointe (9):

‘(9) ciallaíonn ‘sár-ríomhaire EuroHPC’ aon chóras ríomhaireachta atá faoi úinéireacht iomlán an Chomhghnóthais nó atá faoi chomhúinéireacht le Stáit Rannpháirteacha eile nó le cuibhreannas comhpháirtithe príobháideacha, ar féidir leis a bheith ina shár-ríomhaire clasaiceach (sár-ríomhaire ardleibhéil, sár-ríomhaire de ghrád tionsclaíoch, sár-ríomhaire arna optamú leis an intleacht shaorga nó sár-ríomhaire lár-raoin), ina ríomhaire clasaiceach-candamach hibrideach, ina ríomhaire candamach nó ina ionsamhlóir candamach;’;

(2) in Airteagal 3(2), cuirtear isteach an pointe (h) seo a leanas:

‘(h) Monarchana Intleachta Saorga a fhorbairt agus a oibriú chun tacú le héiceachóras intleachta saorga atá an-iomaíoch agus nuálach a fhorbairt a thuilleadh san Aontas’;

(3) in Airteagal 4(1), cuirtear isteach an pointe (h) seo a leanas:

‘(h) colún Monarcha Intleachta Saorga le haghaidh intleacht shaorga iontaofa eiticíúil, lena gcumhdaítear gníomhaíochtaí chun bonneagar seirbhísí sár-ríomhaireachta atá dírithe ar an intleacht shaorga a sholáthar, arb é is aidhm dó cumais, inniúlachtaí agus scileanna taighde agus nuálaíochta éiceachóras na hintleachta saorga a fhorbairt a thuilleadh; áireofar leis na gníomhaíochtaí seo a leanas:

- (i) fáil agus oibriú sár-ríomhairí arna n-optamú leis an intleacht shaorga arna gcomhshuíomh le lárionaid sonraí nó atá nasctha le lárionaid sonraí trí líonraí fíor-ardluais;
- (ii) sár-ríomhairí EuroHPC atá ann cheana a bhfuil cumas intleachta saorga acu a uasghrádú;
- (iii) rochtain agus deiseanna cothroma rochtana ar na sár-ríomhairí arna n-optamú leis an intleacht shaorga nó ar na sár-ríomhairí EuroHPC arna n-uasghrádú le cumais na hintleachta saorga a sholáthar, lena n-áirítear a n-úsáid a leathnú chuig líon mór úsáideoirí poiblí agus príobháideacha, lena n-áirítear gnólachtaí nuathionscanta agus fiontair bheaga agus mheánmhéide;
- (iv) lárionaid seirbhísí sár-ríomhaireachta láraithe nó dailte atá dírithe ar an intleacht shaorga a oibriú chun tacú le héiceachóras na ngnólachtaí nuathionscanta i réimse na hintleachta saorga agus le héiceachóras an taighde agus na nuálaíochta lena soláthraítear tacaíocht algartamach, tacú le samhlacha agus córais oiliúna intleachta saorga a fhorbairt a thuilleadh, a chur faoi oiliúint, a thástáil, a mheas agus a bhailíochtú, agus tacú le forbairt feidhmeanna intleachta saorga ar mhórsála atá ag teacht chun cinn i réimsí straitéiseacha lena n-áirítear an tsláinte agus cúram sláinte, an t-athrú aeráide, róbataic, nó tiomáint nasctha nó uathoibrithe.
- (v) saoráidí clársceidealaithe atá fabhrach don sár-ríomhaire a oibriú, lena n-áirítear chun feidhmeanna intleachta saorga a chomhthreorú chun an úsáid is fearr a bhaint as cumais sár-ríomhaireachta;
- (vi) seirbhísí sár-ríomhaireachta eile lena gcumasaítear an intleacht shaorga a oibriú;

(vii) daoine tréitheacha a mhealladh, a chomhthiomsú agus a chur faoi oiliúint chun a n-inniúlachtaí agus a scileanna a fhorbairt maidir le sár-ríomhairí EuroHPC don intleacht shaorga;

(viii) idirghníomhú le Monarchana Intleachta Saorga eile, rochtain ar a seirbhísí a chur ar fáil ar fud na hEorpa agus comhoibriú le Lárionaid Inniúlachtaí agus Lárionaid Barr Feabhais EuroHPC, agus le tionscnaimh ábhartha intleachta saorga de chuid an Aontais, mar atá moil na ngnólachtaí nuathionscanta i réimse na hintleachta saorga, éiceachóras na hintleachta saorga agus na sonraí, Saoráidí Tástála agus Turgnamhaíochta na hIntleachta Saorga, an tArdán Lárnach Eorpach maidir leis an Intleacht Shaorga, na Moil Nuálaíochta Digití atá dírithe ar an intleacht shaorga, Institiúid Eorpach na bPobal Eolais agus Nuálaíochta Teicneolaíochta a bhaineann leis an Intleacht Shaorga, bonneagair thaighde Eorpacha ábhartha agus tionscnaimh ghaolmhara eile.

(4) in Airteagal 9(5), cuirtear an pointe (g) seo a leanas leis:

‘(g) i gcás na sár-ríomhairí arna n-optamú leis an intleacht shaorga, beidh feidhm ag na critéir roghnúcháin bhreise seo a leanas maidir leis na heintitis óstacha:

(i) gaireacht le lárionad sonraí bunaithe, nó nasc leis trí líonraí fíor-ardluais;

(ii) fíis, pleananna agus cumas an eintitis óstaigh chun aghaidh a thabhairt ar dhúshláin éiceachóras na ngnólachtaí nuathionscanta i réimse na hintleachta saorga, éiceachóras an taighde agus na nuálaíochta, agus phobal úsáideoirí na hintleachta saorga agus seirbhís tacaíochta láraithe nó dailte sár-ríomhaireachta atá dírithe ar an intleacht shaorga a chur ar fáil;

(iii) cáilíocht agus ábharthacht na taithí agus an tsaineolais atá ar fáil ag an bhfoireann atá beartaithe agus a bheadh i gceannas ar thimpeallacht thacúil na seirbhíse sár-ríomhaireachta atá dírithe ar an intleacht shaorga;

(iv) pleananna le haghaidh idirghníomhaíochta agus comhair le Monarchana Intleachta Saorga eile, le Lárionaid Inniúlachta EuroHPC agus le Lárionaid Barr Feabhais EuroHPC agus le gníomhaíochtaí ábhartha intleachta saorga mar atá moil na ngnólachtaí nuathionscanta i réimse na hintleachta saorga, éiceachórais na hintleachta saorga agus na sonraí, Saoráidí Tástála agus Turgnamhaíochta na hIntleachta Saorga, an tArdán Lárnach Eorpach maidir leis an Intleacht Shaorga, na Moil Nuálaíochta Digití atá dírithe ar an intleacht shaorga agus tionscnaimh ghaolmhara eile;

(v) cumais atá ann cheana agus pleananna amach anseo de chuid an eintitis óstaigh chun rannchuidiú le forbairt an díorma tallainne’;

(5) cuirtear míreanna (5a) agus (6a) seo a leanas isteach in Airteagal 9:

(5a) Féadfaidh eintiteas óstach atá ann cheana iarratas a dhéanamh le bheith ina Mhonarcha Intleachta Saorga. Tar éis glao ar léiriú spéise, roghnóidh an Bord Rialaithe eintiteas óstach atá ann cheana trí phróiseas cothrom agus trédhearcach a bheidh bunaithe, *inter alia*, ar na critéir roghnúcháin dá dtuairiscítear in Airteagal 9(5)(g), agus ar choinníoll gur féidir leis an eintiteas óstach a léiriú go bhfuil a dhóthain acmhainní ríomhaireachta ag a shár-ríomhaire EuroHPC chun oiliúint a chur ar shamhlacha mórsála ilchuspóireacha intleachta saorga agus ar fheidhmchláir intleachta saorga atá ag teacht chun cinn;

(6a) Maidir le sár-ríomhairí arna n-optamú leis an intleacht shaorga dá dtagraítear in Airteagal 12a, cruthóidh an t-eintiteas óstach ionad ilfhreastail d’úsáideoirí, lena n-áirítear gnólachtaí nuathionscanta, fiontair bheaga agus mheánmhéide agus úsáideoirí eolaíocha eile, chun rochtain ar a sheirbhísí tacaíochta a éascú.

(6) in Airteagal 10(2), cuirtear an méid seo a leanas in ionad phointe (l):

‘(l) na coinníollacha sonracha is infheidhme nuair a oibríonn an t-eintiteas óstach sár-ríomhaire EuroHPC le húsáid san earnáil tionsclaíochta, nó nuair a oibríonn an t-eintiteas óstach *sár-ríomhaire* arna optamú leis *an intleacht shaorga*.’;

(7) cuirtear isteach an tAirteagal 12a seo a leanas:

‘Airteagal 12a

Fáil agus úinéireacht sár-ríomhairí arna n-optamú leis an intleacht shaorga

1. Gheobhaidh an Comhghnóthas sár-ríomhairí arna n-optamú leis an intleacht shaorga agus is é a bheidh ina úinéir orthu.
2. Cumhdóidh an ranníocaíocht airgeadais ón Aontas dá dtagraítear in Airteagal 5(1) suas le 50 % de na costais fála móide suas le 50 % de chostais oibriúcháin na sár-ríomhairí arna n-optamú leis an intleacht shaorga. Áirítear ar na costais oibriúcháin na costais a bhaineann leis na seirbhísí sár-ríomhaireachta atá dírithe ar an intleacht shaorga.

Costas iomlán úinéireachta na sár-ríomhairí arna n-optamú leis an intleacht shaorga a bheidh fágtha, cumhdóidh an Stát Rannpháirteach ina bhfuil an t-eintiteas óstach lonnaithe nó ag na Stáit Rannpháirteacha sa chuibhreannas óstach an costas sin, costas a fhéadfar a fhorlíonadh leis na ranníocaíochtaí dá dtagraítear in Airteagal 6.

3. Tabharfar aghaidh ar shlándáil an tslabhra soláthair agus soláthróir na sár-ríomhairí arna n-optamú leis an intleacht shaorga á roghnú. Déanfar an roghnú ar bhonn sonraíochtaí tairisceana a bheidh bunaithe ar an éileamh, a chuirfidh san áireamh riachtanais an úsáideora agus sonraíochtaí ginearálta an chórais arna sholáthar ag an eintiteas óstach roghnaithe ina iarratas ar an nglao ar léiriú spéise.
4. Féadfaidh an Comhghnóthas feidhmiú mar chéad úsáideoir sár-ríomhairí arna n-optamú leis an intleacht shaorga lena gcomhtháthaítear teicneolaíochtaí a fhorbraítear go príomha san Aontas.
5. Féadfaidh an Bord Rialaithe cinneadh a dhéanamh sa chlár oibre, má tá údar cuí leis ar chúiseanna slándála, coinníoll a leagan síos do rannpháirtíocht soláthróirí agus na sár-ríomhairí arna n-optamú leis an intleacht shaorga á bhfáil i gcomhréir le hAirteagal 12(6) de Rialachán (AE) 2021/694, nó chun rannpháirtíocht soláthróirí a theorannú ar chúiseanna slándála nó gníomhaíochtaí a bhaineann go díreach le huathriail straitéiseach an Aontais, i gcomhréir le hAirteagal 18(4) den Rialachán sin.

6. Beidh na sár-ríomhairí arna n-optamú leis an intleacht shaorga lonnaithe in eintiteas óstach shár-ríomhaire EuroHPC nó i lárionad sár-ríomhaireachta atá lonnaithe san Aontas.
7. Gan dochar d'fhoirceannadh an Chomhghnóthais, dá dtagraítear in Airteagal 23(4) de na Reachtanna, 5 bliana ar a thúisce tar éis tástáil inghlacthachta rathúil an tsár-ríomhaire arna optamú leis an intleacht shaorga arna shuiteáil in eintiteas óstach, féadfar úinéireacht an tsár-ríomhaire arna optamú leis an intleacht shaorga a aistriú chuig an eintiteas óstach sin, é a dhíol le heintiteas eile nó a dhíchoimisiúnú ar chinneadh an Bhoird Rialaithe agus i gcomhréir leis an gcomhaontú óstach. I gcás aistriú úinéireachta sár-ríomhaire arna optamú leis an intleacht shaorga, déanfaidh an t-eintiteas óstach luach iarmharach an tsár-ríomhaire a aistrítear a aisíoc leis an gComhghnóthas. Mura ndéantar aon aistriú úinéireachta chuig an eintiteas óstach ach má chinntear é a dhíchoimisiúnú, comhroinnfear na costais ábhartha go cothrom idir an Comhghnóthas agus an t-eintiteas óstach. Ní bheidh dliteanas ar an gComhghnóthas maidir le haon chostas a thabhfófar tar éis úinéireacht an tsár-ríomhaire arna optamú leis an intleacht shaorga a aistriú nó tar éis a dhíolta nó a dhíchoimisiúnaithe.'
- (8) leasaítear Airteagal 15 mar a leanas:
- (a) cuirtear an méid seo a leanas in ionad mhír 1:
- ‘1. Féadfaidh an Comhghnóthas glao ar léirithe spéise a sheoladh chun na sár-ríomhairí EuroHPC a bhfuil sé ina úinéir nó ina chomhúinéir orthu a uasghrádú, *chun leibhéal feidhmíochta an tsár-ríomhaire a ardú gar don eacsascálú, nó chun cumais intleachta saorga an tsár-ríomhaire a mhéadú, nó chun feidhmíocht oibríochtúil an tsár-ríomhaire a mhéadú ar bhealach ar bith eile, lena n-áirítear luasairí candamacha.* ’;
- (b) scriostar mír 2;

(c) cuirtear an méid seo a leanas in ionad mhír 5:

‘5. Beidh *céatadán* ranníocaíocht airgeadais an Aontais le haghaidh *chostais fála* an uasghrádaithe *mar an gcéanna leis an gcéatadán de ranníocaíocht airgeadais an Aontais don sár-ríomhaire EuroHPC bunaidh*, arna dhímheas thar shaolré ionchasach an tsár-ríomhaire bunaidh. Beidh *céatadán* ranníocaíocht airgeadais an Aontais le haghaidh *chostais oibríochtúla bhreise* an uasghrádaithe *mar an gcéanna leis an gcéatadán de ranníocaíocht airgeadais an Aontais don sár-ríomhaire EuroHPC bunaidh*. I gcás na sár-ríomhairí peiteascála arna bhfáil agus Rialachán (AE) 2018/1488 i bhfeidhm, cumhdófar le ranníocaíocht airgeadais an Aontais le haghaidh an uasghrádaithe suas le 35 % de na costais oibríochtúla bhreise’;

(9) leasaítear Airteagal 16 mar a leanas:

(a) cuirtear an mhír 1a seo a leanas isteach:

‘1a. Úsáidfear na sár-ríomhairí arna n-optamú leis an intleacht shaorga agus na sár-ríomhairí EuroHPC arna n-uasghrádú le haghaidh chumais na hintleachta saorga go príomha chun samhlacha oiliúna mórsála ilchuspóireacha intleachta saorga agus feidhmeanna intleachta saorga atá ag teacht chun cinn a fhorbairt, a thástáil, a mheas agus a bhailíochtú, chomh maith le forbairt bhreise a dhéanamh ar réitigh intleachta saorga san Aontas a éilíonn Ríomhaireacht Ardfheidhmíochta agus algartaim mhórsála intleachta saorga a fhorghníomhú chun fadhbanna eolaíochta a réiteach.’;

(b) cuirtear an mhír 2a seo a leanas isteach:

‘2a. Saineoidh an Bord Rialaithe coinníollacha speisialta rochtana do na sár-ríomhairí arna n-optamú leis an intleacht shaorga agus do shár-ríomhairí EuroHPC arna n-uasghrádú le haghaidh cumais intleachta saorga i gcomhréir le hAirteagal 17 agus riachtanais shonracha éiceachóras na ngnólachtaí nuathionscanta i réimse na hintleachta saorga agus éiceachóras an taighde agus na nuálaíochta á gcur san áireamh. Áireofar leis sin rochtain thiomnaithe ar ghnólachtaí nuathionscanta agus ar fhiontair bheaga agus mheánmhéide. Ní bheidh ach tograí chun samhlacha, córais agus feidhmeanna intleachta saorga iontaofa eiticiúil a fhorbairt atá i gcomhréir le luachanna an Aontais incháilithe le haghaidh rochtana.’

(10) cuirtear an méid seo a leanas in ionad mhír 1 d’Airteagal 17:

‘1. Beidh an sciar d’aga rochtana an Aontais ar gach *sár-ríomhaire EuroHPC* ardleibhéil, candamach, agus arna optamú leis an *intleacht shaorga* i gcomhréir dhíreach leis an ranníocaíocht airgeadais ón Aontas dá dtagraítear in Airteagal 5(1) le costas iomlán uinéireachta an tsár-ríomhaire EuroHPC agus, dá bhrí sin, ní rachaidh sé thar 50 % d’aga rochtana iomlán an tsár-ríomhaire EuroHPC.’

Airteagal 2

Tiocfaidh an Rialachán seo i bhfeidhm an 20ú lá tar éis lá a fhoilsithe in *Iris Oifigiúil an Aontais Eorpaigh*.

Beidh an Rialachán seo ina cheangal go huile agus go hiomlán agus beidh sé infheidhme go díreach i ngach Ballstát.

Arna dhéanamh sa Bhruiséil,

Thar ceann na Comhairle

An tUachtarán